

Date – 15/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Naktuk Assembly Budget session kal lai ni hnunung ber turah Chief Minister Pu Lalduhoma leh Pu F. Rodingliana te department enkawl sum hmanna tur ruahmanna sawi hova pawm tum a ni ang.
2. Gauhati High Court chuan Aizawl-Vairengte inkara kawng siamtu contractor pakhat chu khawl leh mihring chhawr belh turin a hriattir nawn.
3. Supreme Court-in Mizo Chiefs Council-in an ram chhuhsak an nih man zangnadawmna an dil chu a hnawlsak.
4. State 4 leh Union Territory 1-a Assembly inthlan neih dan tur Election Commission-in a puang.

<><><>

ASSEMBLY SESSION

Naktuk Assembly Budget session ni hnunung ber turah Chief Minister Pu Lalduhoma leh Pu F. Rodingliana te department enkawl sum hmanna tur ruahmanna sawi hova pawm tum a ni ang.

Naktuk chawhma dar 10 leh a chanve a assembly session tan a nih hunah darkar khat chhung chu zawhna leh chhanna hun atana hman a ni ang a. Chumi zawhah Finance changtu Chief Minister Pu Lalduhoma'n Demand for Grants 2026 – 2027 pheik 529 leh 530 tihdikna House dawhkanah a dah ang a. Pu Lalmuanpuia Punte in "Mau mitvel" chungchang thu a sawi ang. Hemi hnu hian Pu F. Rodingliana'n a department enkawl a sum ruahman - cheng vaibelchhe 1002, nuai 68, sing 4 leh sang 9 hmanna tur Power & Electricity leh cheng vaibelchhe 63, nuai 57, sing 8 leh sang 5 hmanna tur Commerce, Industries, Geology & Mining, a vaiin cheng vaibelchhe 1066, nuai 26, sing 3 leh sang 4 hmanna tur ruahmannate House pawmpui turin a thehlut ang a. Chief Minister Pu Lalduhoma pawhin cheng vaibelchhe 37, leh nuai 66 hmanna tur Legislative Assembly, cheng nuai 30 leh sing 8 hmanna tur Governor, cheng vaibelchhe 9, nuai 3 sing 4 leh sang 3 hmanna tur Council of Ministers, cheng vaibelchhe 81, nuai 67, sing 1 leh sang 1 hmanna tur Law & Judicial, cheng vaibelchhe 8, nuai 6 leh sang 7 hmanna tur Vigilance, cheng vaibelchhe 4,777, nuai 83, sing 2 leh sang 1 senna tur Finance, cheng vaibelchhe 131, nuai 21, leh sang 1 senna tur Secretariat Administration, cheng vaibelchhe 360, nuai 78, sing 1 leh sang 6 senna tur Planning & Programme Implementation leh cheng vaibelchhe 106, nuai 23, leh sang 1 senna tur General Administration, a vaiin

cheng vaibelchhe 5,512, nuai 78 leh sang 8 senna turte House pawmpui turin a thelut bawk ang a. Minister 2-te budget demand hi sawi hova pawm nghal tum a ni ang.

Minister 2-te department enkawlna atana budget a sum ruahman chungchang sawiho a, minister 2-in sawihona tlangkawma an khaikhawm hnu-a vote lak a nih hnu-ah Finance changtu Pu Lalduhoma'n chuan "The Mizoram Appropriation (Demand for Grants 2026-2027) Bill, 2026." chu House pawmpui turin a pulut ang a. Hei hi pawm a nih chuan tangka kum thar (2026-2027) budget a sum ruahmante hi hman theih a ni tawh dawn a ni.

He mi hnu hian BAC-in budget session kal lai hi pawhsei a rawt a nih loh chuan Assembly inkhawm hi Speaker Pu Lalbiakzama'n tiam chin awm lovin a titawp (adjourned sine die) dawn a ni.



UNREGULATED OIL EXPORT

Asia khaw thlang lama indona avanga tuialhthei harsatna awm thei hlauhna a len viau lai-in Lawngtlai leh Siaha atangin Myanmar lamah petrol leh diesel thawn luh reng a la ni.

Mizoram Supply department chuan Ministry of Petroleum & Natural Gas thuchhuah sawi chhawngin, tun dinhmunah ram pumah eirawngbawlna gas leh tuialhthei hman tur India in chhekkhawl tha ni a sawi a nih lai-in indona thlang mek avanga harsatna an tawh loh nan mipuite chu eirawngbawlna gas leh tuialhthei renchem a tul tih an sawi a ni. Nilaini a Supply department-in thu an chhuah atang hian Petrol leh diesel lakna hmun a lun nghal a, thui tak taka lirthei intlar hmuh tur a awm a ni. He tiang a nih lai mek hian Lawngtlai atanga thu dawn chuan Zochachhuah leh Hruitezawl lamah tuialhthei hi Myanmar a phurh luh reng a nih thu an sawi a. Siaha district-ah pawh Lungpuk atanga thawn luh reng a ni a. He ta rawn lei bertute hi Chin state chhim lama awm Rakhine mite an nih thu an sawi bawk.

Lawngtlai district tlawmngai pawlte chuan Mizoramin tuialhthei harsatna namen lo a tawh theih reng lai a Myanmar lama tam tham tak tawlh luh reng a ni chu tihtawp an duh thu leh sorkarin hma la se an duh thu an sawi a, Chief Minister Pu Lalduhoma pawhin Nilaini khan Assembly inkhawmah ruahmanna fel awm lova chhim lam, a bikin Zochachhuah a insumdawn tawna lian tham kalpui a ni chu a vei thu a lo sawi tawh a ni.



HC ON HIGHWAY

Gauhati High Court-a judge pahnih thutna bench chuan Aizawl-Vairengte inkara kawng siamtu contractor pakhat chu khawl leh mihring chhawr belh turin a hriattir nawn.

High Court bench-in khawl leh mihring chawr belh tura a hriattir nawn J. Infratech Limited hian Sairang Zero Point leh Buichali lei inkar, New Khamrang leh Kawnpui inkar leh Kolasib leh Bilkhawthlir inkar kawngpui siam hna NHIDCL hnuaiah a thawk a. Kar kalta Nilaini khan Justice Budi Habung leh Justice Kaushik Goswami te thutna bench chuan, "February ni 4 a he court thupek angin thupek an zawm thu hi J. Infratech Limited hian affidavit an rawn thehluk belh a. Hna an thawh belh leh an hmasawn dan bakah report hmasa zawh an thehluk hnu thla 2 dawn chhunga an hnathawh za zela a pun chhoh dan an tarlang bawk a ni," a ti a, a khingtu Mizoram Truck Drivers Association (MTDA) aiawha ding Emily L. Chhangte erawh chuan a hmun ngei a tlawhin kawngpui dinhmun la chhiatzia thu a sawi a. He tiang renga an hna hi an kalpui chuan fur a lo thlen meuh chuan kawng hi nasa takin a chhe leh dawn a ni a ti a. A dinhmun dik tak hi report a pek theih na'n chawlhkar khat hun pe turin Court hi a ngen a ni.

Judge pahnihte chuan J. Infratech Limited chu April thla chhung ngei a kawngpui siamthat hna thawk zo hman tura thu pek an nih tawh thu an tarlan nawn leh rualin fur lo thleng hnai tawh nen he company hna thawh danah hian court a lungawi lo hle tih an sawi a. Hnathawh theih hun lai a hna thawhna atana hman khawlte leh mihring an chhawr belh loh chuan fur ruahtui a tlak chuan kawngpui hi a chhe leh zual dawn a ni an ti a. Khawl leh mihring chhawr belh nghal turin contractor hi a hriattir a, hma an la ngei a ni tih finfiahna affidavit March ni 24-a thehlut tura hriattirin an ti lo a nih chuan a mawhphurtu officer chu court-a inlan ngei tura koh luh a nih tur thu an tarlang bawk a, he thu hi Court hian March ni 25-ah a ngaihtuah leh dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SC ON CHIEFS

Supreme Court chuan Mizo Chiefs Council-in an ram chhuhsak an nih man zangnadawmna an dil chu a hnawlsak.

India rama Court sang bera Justice JB Pardiwala leh Justice R Mahadevan thutna bench chuan hemi chungchangah hian Nilaini khan thutlukna a siam a. Mizo Chiefs Council-in an president Pu L. Chinzah kal tlanga petition an thehluk a, India sorkarin kha tih lai Lushai Hills a Mizo lalte ram India sorkarin zangnadawmna pe lova a chhuhsak ti a sorkar an khinna chu a hnawl a ni. Mizo lal lo ni tawh leh an thlahte aiawha din Mizo Chiefs Council chuan India sorkar chu Mizo lalte chanvo, a bikin 'right to property' chhuhsak ah an puh a. He mi chungchangah hian Court chuan India Constitution Article 19(1)(f) leh Article 31-na chuan mihring chanvo, a bikin right to property chungchang hi a ziak ngei a. Chuti chung chuan Mizo lalte hian an chanvo palzuta rahbeh a ni tih hi Court-ah an finfiah thei lo a ni, a ti a ni.

Mizo lalte hian British hun lai a India rama lalram (princely state) te nen khan inang khat an nih thu an sawi na a, Court chuan India rama lal dangte kha chu Constitution duan hma a inremna siam anga zangnadawmna pek an ni a, chutiang chu Mizo lalte dinhmun a ni ve lo a ti.

Mizo lalte kha British-in an ram a awp hma khan ram bik nei-in an awm a. Chumi huam chungah chuan thuneihna tawp an nei tih sawiin, Dan siam theihna, kenkawh theihna leh court lam rorelna zawng zawng kha an thuhnuai-ah a awm vek a ni, an ti a. Chu tiang a nih lai chuan British sorkarin an awp hnu khan lal an la ni zui chungin an thuneihna a tlem chho telh telh a. India ram a zalen hnu khan Assam sorkara hill district pakhata dah niin kum 1954 khan Assam assembly chuan Assam Lushai Hills District (Acquisition of Chief's Rights) Act, 1954 dan siamin zangnadawmna engemawzat pe-in lalte chu a ban ta a ni.

<><><>

MMR

All NGO Zobawk North chuan a nau hrin hnuah thi Pi F. Lallawmkimi chungchang chu na taka umzui an tum thu an sawi.

Vawiina an thuchhuaha an tarlan danin Ningani kalta zan dar 6:30 a Pi F. Lallawmkimi (31), Pu PC.Lalremruata nupui, Zobawk North, Civil Hospital Lunglei a raicheha a boral chungchangah Civil Hospital Lunglei-a thawktute'n Pi F.Lallawmkimi khawlaia nau hring tawh an dawngsawng thei lo chu hriatthiam harsa an tih thu an sawi a. An lung a dam thei lo tih tarlangin Civil Hospital a thawkte an dem takzet tih an sawi a. He thil thleng a mawhphurtute chungah na taka hremna lek turin Health Minister an ngen tih an sawi a ni.

All NGO Zobawk North chuan Pi F. Lallawmkimi'n a kalsan tak a fate enkawl na'n zangnadawmna pek a nih theih na'na hmalak sak turin Health Minister an ngen baw a. Hetianga mirethei leh dinhmun harsa zawkte chungah harsatna thleng ang hi tun hnuah Lunglei Civil Hospital-ah thleng nawn tawh lo se an duh takzet tih thuchhuaha hian an tarlang a. Thuchhuah an siam chu tun thla ni 21 thleng an ngaichang dawn tih sawiin hmalakna a awm lo a nih chuan nasa zawk a lungawilohna lantir an tum thu an sawi baw.

(Thangmingliana Renthlei, PTC Lunglei)

<><><>

ASSEMBLY POLL DATES

Election Commission-in State 4 – Assam, West Bengal, Tamil Nadu leh Kerala leh Union Territory 1 - Puducherry assembly inthlan neih dan tur, vawiin khan a puang a, seat 294 awmna West Bengal-ah chuan inthlan hi thawh hnihah neih a ni ang a, April ni 23 leh ni 29-ah vote thlak a ni ang.

Seat 234 awmna, Tamil Nadu-ah April ni 23-ah vote thlak a ni ang a, member 126 awmna, Assam, Seat 140 awmna Kerala leh seat 30 awmna Puducherry-ah April ni 9 ah vote thlak a ni ang a, vote hi a rualin May ni 4-ah chhiar a ni ang.

Chief Election Commissioner, Gyanesh Kumar-a'n Delhi-a thuthar lakhawmtute a hrih danin, assembly inthlan neihna tur state leh union territory-ah hian vote nei mi vbch 17 leh nuai 4 vel an awm a, Assam-ah vote nei mi vbch 2 leh nuai 50 awmin Kerala-ah vbch 2 leh nuai 70 an awm a ni.

(CEC)

CEC Pu Kumar-a chuan Puducherry-ah vote nei mi nuai 9 sing 4 sang 4, Tamil Nadu-ah vbch 5 leh nuai 67, West Bengal-ah vote nei mi vbch 6 leh nuai 44 an awm thu pawh sawiin Assembly inthlan neih hun tur puan anih rual hian model code of conduct kenkawh nghal a ni, a ti bawk.

